

Date – 20/02/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Mizoram State Day vawi 39-na vawiin khan President, Vice President, Prime Minister leh ram hruaitu hrang hrang ten Mizoram State Day lawmpuina an hlan.
2. Chief minister Pu Lalduhoman Mizoram din thàr lehna tur hmarua chu beiseina a ni a ti.
3. Meghalaya Lok Sabha MP Dr.Ricky A.J Syngkon chu nizan khan lungphuchawl avangin a thi.
4. India leh US chuan vawiin khan New Delhi-a India AI Impact Summit ah Pax Silica declaration an ziak



STATE DAY OF PRAYER

Vawiin hi Mizoram State Day vawi 39-na a ni a, President, Vice President, Prime Minister leh ram hruaitu hrang hrang ten Mizoram State Day lawmpuina an hlan.

President Droupadi Murmu i chuan Social Media account kaltlangin Mizo mipuite state day chibai a buk a, Mizorama chengte chu ram hmasawna tura tha an thawhna hrang hrang chu hlu atih thu sawiin hmasawn zel turin duhsakna a hlan a ni.

Vice President CP Radhakrishnan chuan Mizoram chu khuanu kutchhuak mawina tam tak awmna hmun ani a ti a, a ramngaw mawina leh a boruak thiang tak chu India inchhuanna a ni tih sawiin remna leh muanna avanga a hmingthanna chu chhonzawm zel turin a chah a ni.

Prime Minister Narendra Modi a chuan Mizo hnam ziarang leh nunphung mawi tak chu mipuite hip tu ani a ti a, tualchhung inrelbawlna tha tak leh inunaua tha tak bakah midangte inzah tawn taka an awm chu chhuanawm atih thu a sawi.

Union Home Minister Amit Shah pawhin Mizoram Statehood Day chibai bukin remna leh muanna avanga an hmingthanna chu chhonzawm zel turin a chah a ni.

Union Health Minister JP Nadda pawhin Mizoram State Day chibai bukin Mizoram mawina leh mipuite thawhrimna chu chhuanawm atih thu a sawi a, state hlim thei tak leh midangte inngaihsakna hmun ani chu chhuanawm atih thu a sawi bawk.

Parliamentary Affairs Minister Kiren Rijiju chuan Mizoram Statehood Day chibai bukin Mizo nunphung leh hnam ziarang mawi tak chu chhuanawm atih thu a sawi a, ram tana ke pen zel turin a sawm a ni.

DoNER Minister Jyotiraditya M. Scindia chuan Mizo mipuiten State ni tura an thawhrimna chu chhuanawm atih thu a sawi a, remna leh muanna avanga an hmingthanna chu hlu atih thu sawiin mipuite State Day hlim taka hmang turin duhsakna a hlan a ni.

Lok Sabha-a Leader of Opposition leh Congress hruaitu Rahul Gandhi pawhin Mizoram Statehood Day chibai bukin Mizoram hnam ziarang leh nunphung mawi tak chu chhuanawm atih thu a sawi a, state chhunga mipuite inlungualna chu chhonzawm zel tha atih thu a sawi bawk.

BJP President Nitin Nabin pawhin Mizo mipuite Statehood Day chibai bukin remna leh muanna kawnga an hmalakna chu chhuanawm atih thu a sawi a, Mizoram chu ram mawi tak mi cheng te nun ze mawi tak awmna ani tih sawiin state chu hmassawn zel turin duhsakna a hlan a ni.

Mizoram state puitlinga hlankai a nih champha, 'State Day vawi 39-na vawiin hian State Day of Prayer Committee bultumin Mizoram hmun hrang hrangah ram tana chawngheia tawngtaihona neih a ni.

State Day of Prayer hi ZPM sorkar chuan bultanin, tun hi a tum thumna a ni a, thupui atan 'I din thar leh ang u (Nehemia 2:17)' tih hman a ni.

Aizawlah chuan State Day of Prayer hi Lammualah Chief Minister Pu Lalduhoma hoin hman a ni a; State Day of Prayer of Worship Team-te kaihhruaiin chawhma dar 10:30 atanga chhun dar 12:30 thleng zaihona leh tawngtai hona neih niin, Aizawl khawpui hmun li atangin kea kawngzawh leh hmun thum atangin two wheeler hmanga kawng zawh a ni a, Lammualah an intawkkhawm a ni.

State Day of Prayer Committee chairman Rev. Lalramliana Pachuau kaihhruaiin State Day of Prayer pual inkhawm hi neih a ni a; Chief Minister Pu Lalduhoma'n thu a sawi bakah, State Day of Prayer Committee working chairman Pu F. Rodingliana, minister of state pawhin thu a sawi.

Puan tawh angin State Day of Prayer Committee chairman Rev. Lalramliana Pachuau chuan tunthla ni 13-a thuthar thehdarhtute an kawmnaah State Day puala tawngtaihona tura inbuatsaihna atana senso ngaite hi mi thahnemgaiten an thawh

thin thu leh sorkar sum hman a ni loh thu a sawi a; State Day puala tawngtaihona atan hian cheng nuai 15 ruahman a nih thu a sawi bawk.

State Day of Prayer hi dist hrang hrangah an remchan dan angin an huaihawt a ni.



STATE DAY MESSAGE

Mizoram State Day pualin Larsap, Chief Minister leh party hruaituten mipuite State Day chibai a buk a.

Gen (Retd) Vijay Kumar Singh an Mizoram chu state a nih hnuah muanna, hmasawna leh hlawhtlinna kawng hrangin a zawh chho a ti a, State Day chu Mizo mipuite chhelna, inpumkhatna leh suangtuahna ataka nemnghehna ani tih a sawi.

Byte : Governor

Chief Minister Pu Lalduhoma chuan Mizoram mipuite State Day chibai bukin State Day dam taka an thlen theih nachhan chu Mizo mipuite tawngtaina avang ani a ti a.

Chief Minister hlui leh MNF President Pu Zoramthanga pawhin Mizo mipuite State Day chibai bukin Mizoram State lo pianchhuahna chu MNF leh India Sorkar Inremna Thuthlung rah a ni a ti a. Peace Accord hlawhtling ber zinga mi an neih theihna kawnga mi tin te tanrualna chu chhuanawm atih thu sawiin Mizoram State Day chu Mizoram chhunga chengte tan mai bakah hmun hrang hranga cheng Mizo mipui zawng zawngte tan a hlu takzet a ni a ti.

BJP Mizoram President Dr K. Beichhua chuan Mizoram Statehood Day pualin mizo mipuite chibai a buk bawk.

Mizoram Statehood Day vawi 39-na lawmna pual hian Shillong Group Young Mizo Association leh Mizo Students Union , Shillong te chuan vawiin khan Mizoram House, Cleve Colony, Shillong-ah Thisen pek Camp an buatsaih a mi 70 velin thisen an pe a ni..

Programme hi Young Mizo Association, Shillong President Pu. Ricky Zobiakvela Renthlei chuan kaihruiin vawiina an thioitih chuan Shillong-a Mizo zinga khawtlang inpumkhatna, lainatna leh rawngbawlina rilru nghet tak a lantir bawk a ni a ti.



STATE DAY OF PRAYER-CM

Chief minister Pu Lalduhoman Mizoram din thàr lehna tur hmarua chu beiseina a ni a ti.

Vawiina Aizawl Lammuala State Day of Prayer hmannaah he thu hi sawiin Pu Lalduhoma chuan beidawna hi setana hmanrua a ni a, beiseina hi Pathian hmanrua a ni, a ti.

Pu Lalduhoma chuan, mi tam tak chu ram roreltuteah an beidawn tawh thu leh platform hrang hrangah hruaitute dukhawp lohna leh ram rorelnaa phunnawina a tam tawh thu a sawi a, tu party pawh sorkar se engmah an ni chuang lo ang tih beidawna ri a ring hle a. Vawiinah hian indin thar lehna turin beiseina neih a ngai a ti. Mizoram zimteah kohhran hrang hrangah tual upa chin chunglam rawngbawltu sing 3 chuang an awm tih sawiin beidawn tur an ni lo a ti a ni.

A thusawi thupui tur atan 'Ka thlarau zawkin le' tih a thlan thu Pu Lalduhoma chuan a sawi a, kum 5 lo awm leh tur atana India ram state-ten pawisa an hman tur zat chu 16th Finance Commission-in an rel a, Parliament-a an pharhah chuan state 28 zinga state 19-in a hmaa an dawn zat an pha tawh lo a, state 9 chauh a hmaa dawn zat aia sang dawng an awm a, chumi zingah chuan Mizoram a tel tih sawiin hei hi thlarau hnathawh a ni lo tih sawi theih a ni a ti.



HANHOLDING SCHEME-GINGER

Mizoram sorkar flagship programme Bana Kaih Scheme kaltlanga kut hnathawktute sawhthing lei leh hralh kalpui mekah sorkarin sumdawngten kut hnathawktute sawhthing an leisakna tur hniam ber a bituk chu chawhrualin cheng 32 leh pawisa 56 a ni mek a; Handholding chungchanga Adviser to CM Dr. KC Lalmalsawmzauva, Mizoram Agriculture Marketing Board Co-Chairman ni bawk chuan kut hnathawktute kuta kg khata cheng 50 luhtir chu sorkar thupui a nih thu a sawi.

Dr. KC Lalmalsawmzauva hian tun hnaia Akashvani News Aizawlin a kawmnaah, Bana Kaih Scheme kaltlanga ‘sawhthing lei leh hralh’ tihin a tum ber chu kut hnathawktu Mizoram mipui zaa 60 vel bawrten lei rem an lo rah ve theih nan sorkar chu sumdawngte leh sawhthing chingtute suihezawmtu facilitator a nih thu a sawi a; nikum khan February ni 20-ah kan kalpui tan a, kuminah chuan Februaru ni 2-ah kan kalpui. Sorkar chuan kan lo sawi tawh angin kut hnathawktute kuta Rs 50 a luh dan tur kha kan thupui a ni mai a, engpawh lo thleng se sorkar chu a inbuatsaih a ni, a ti.

Sumdawngte leh sawhthing chingtute inkara sorkar a inrawlh chhan sawiin Dr KC Lalmalsawmzauva chuan, tun hma zawng khan sawhthing chingtute chu vai sumdawngten an duh zat rate-in an leisak thin a, kut hnathawktute an tangrual thei si lo a, chuvangin sorkarin support price nen an thlavang a hauhsak a lo ngai ta a ni, a ti a; kut hnathawktute society-a an awm tirna chhan chu sawhthing man thu hla leh thil dangah an tanrual theihna tur a nih thu a sawi.

Society chu kut hnathawktute tan a nih thu leh sumdawngte leh kut hnathawktu society-te chu a tam thei ang ber indawr se tih chu sorkar duh dan leh hmathlir a nih thu a sawi bawk a; sorkar chuan target a siam a, nikum khan a bul tanna a nih avangin a pulunga sawhthing lei a ni a, kuminah a sawngbawlina din uar niin, nakum lamah uar zawka a chin dan tha inzirtirna kalpui leh tum a nih thu a sawi bawk.



OIL PALM

Agriculture & Farmers' Welfare minister Pu PC Vanlalruata chuan Lawngtlai district-a Liapha khuaah Oil Palm Mill bun thar tumin hma an la mek thu a sawi.

Assembly zawhna ziaka chhangin Agriculture Minister he thu hi a sawi a, Mizoramah Oil Palm Mill bun turin Patanjali Foods Limited-ten Lawngtlai district-a Liapha khuaah hma an la mek, a ti.

Agriculture Minister hian Godrej Agrovet Limited leh Patanjali Foods Limited ten kut hnathawktute hnen atangin Oil Palm rah an lei sak mek thu a tarlang bawk a; National Mission on Edible Oils-Oil Palm (NMEO-OP) scheme-in formula price a siam hmangin Oil Palm rah hralhna man bithliah thin a nih thu leh, thla tin a hralhna man hi a danglam thin thu a tarlang a, sorkar kum kal mekah company-te hian Oil Palm rah hi chawh rualin kg. khat Rs 14.13-in an lei thu a tarlang bawk.

((VOICE CAST - Pu PC Vanlalruata chuan National Mission on Edible Oils-Oil Palm (NMEO-OP) scheme hmangin Oil Palm rah hralhna man puihna Viability Gap Payment (VGP) pek a nih thu leh VGP hmanga Oil Palm rah hralhna man puihna hi kum tin a danglam thu a tarlang a, kum 2022-23 atana tanpuina pek zat chu kg.-ah Rs. 3.05 a nih thu leh tunah hian 2023-24 atan kg.-ah Rs. 3.18 niin, sem chhuah tura buaipui mek a nih thu a tarlang a ni.))



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



MEGHALAYA MP

Meghalaya Lok Sabha MP Dr.Ricky A.J Syngkon chu nizan khan lungphuchawl avangin a thi. Kum 54 a upa Dr.Syngkon-a hi Shillong Parliamentary Constituency atangin Lok Sabha MP atana thlan tlin a ni a. Voice of the People Party hruaitu niin rampum huap politics khawvelah pawh Meghalaya tana awh chhuah nasa bera ngaih a ni a. Thudawn danin Dr.Syngkon hi nizana Mawlong-a futsal an khelh laiin a lung lam harsatna avangin a tlu a. Damdawiin panpui anih hnuah a thi a ni.

Dr. Syngkon-a thihna hian Meghalaya state pum a nghawng na hle a. Hruaitu hrang hrangten an ui thu an sawi a. Meghalay Chief Minister Conrad Sangma pawhin a ui thu sawiin vawiina Meghalaya Assembly-a budget pharh tur pawh a sawn hla a ni.



PAX SILICA DECLARATION

India leh US chuan vawiin khan New Delhi-a India AI Impact Summit ah Pax Silica declaration an ziaik. He declaration avang hian ram pahnihte mineral vang chi leh semiconductor siamchhuah lamah chak zawkin an thawkdun ang a, Airtificial Intelligence AI than chhoh zelna leh silicon leh technology ecosystem tha leh him siam kawngah a pui dawn a ni. He inremna ziahna hun hi Union Minister of Electronic and Information Technology Ashwini Vaishnaw chuan a kaihruai a. Thusawiin India in a tum ber chu Semiconductor leh Electronic Industry ah a hmahruaitu anih thu a sawi.



IRAN & RUSSIA

Iran leh Russia lawng sipaite chuan Gulf of Oman leh Indian Ocean hmar lamah sipai nunchan an zirdun mek. US in sipai chakna hmanga Iran run a tum tih thuthang awm mek karah ram pahnih sipaite hian nunchan hi an zir a. Thudawn danin Iran ralthuam neih that Alvand destroyer te, missile kapchhuak thei lawng liante, helicopter, landing craft, special operation team leh combat speedboat te an tel a ni.

